

## Morning Dogri (NSD) Bulletin 26-03-2024

### आकाशवाणी

- विदेश मंत्री डॉक्टर एस. जयशंकर हुंदी सिंगापोर दे प्रधानमंत्री ली सेन लूंग हुंदे नै मलाटी, भारत प्रशांत ते पच्छिम एशिया बारे होई गल्लबात।
- भारती तटरक्षक बलें पोरबंदर च इक डुब्बा र'दी किशती चा 5 मछुआरें गी बचाई लैता ऐ।
- एशिया प्रशांत आर्थिक सहयोग ए.पी.ई.सी दे मौसम केंद्र नै जुलाई कोला सितंबर तगर भारत च औसत कोला मती बरखा बरने दी पेशनगोई कीती ऐ।
- जम्मू-कश्मीर च इस बारे दी श्री अमरनाथ जी दी जातरा गितै तयारियां शुरू।
- ते आई.पी.एल च कल रॉयल चैलेंजर्स बेंगलुरु नै पंजाब किंग्स गी 4 विकेटें कन्ने हराई दिता। अज्ज चिन्नेई सुपर किंग्स ते गुजरात टाइटन्स बश्कार मुकाबला होग।

<><><><><><>

### Jai Shankar Singapore

विदेश मंत्री डॉक्टर एस. जयशंकर होरें कल सिंगापुर दे प्रधानमंत्री ली सीन लूंग हुंदे नै मलाटी कीती। बैठक दौरान दौनें लीडरें भारत प्रशांत ते पच्छिम एशिया पर विचारें गी आपूंचै सांझा कीता।



## APCC-Indian Climate

एशिया प्रशासन आर्थिक सहयोग जलवायु केंद्र दी पेशनगोई मुजब जुलाई कोला लेइए सितंबर म्हीने तगर मानसून दौरान भारत च औसत कोला मती बरखा पौने दी मेद दस्सी गई ऐ। मौसम बारै जारी इस बरे दी पैहली पेशनगोई च अप्रैल कोला जून ते जुलाई कोला सितंबर तोड़ी दी अवधि लेई बकखरे-बकखरे अनुमान दस्से गे न।

<><><><><><>

## IMD-Rainfall

मौसम विभाग मुजब अज्ज अरूणाचल प्रदेश, असम ते मेघायल च भारी बरखा दी तवक्को ऐ। नागालैंड, मणिपुर, मिजोरम, त्रिपुरा, सिक्किम ते पच्छिम बंगाल दे हिमालय कन्ने लग्गे दे इलाकें ते गंगा नदी कन्ने लगदे मैदानी इलाकें च अज्ज हल्के कोला दरम्याने दर्जे दी बरखा बरने दे आसार दस्से गे न।

<><><><><><>

## Balooch

पाकिस्तान दे बलूचिस्तान च बलूच नैशनल मूवमेंट दे मनुक्खी अधिकारी सरबंधी सीगे पैक नै पाकिस्तानी बलें आस्सेआ 4 बलूच नौजवानें गी अगवाह करी लैने दा दोष लांदे होई उत्थूं दे लोकें पर पाकिस्तान दिएं बधदिएं ज्यादतिएं खलाफ इक बारी परतिण जबरदस्त रौ-रौस्सा प्रगट कीता ऐ।

इक सोशल मीडिया पोस्ट च पैक नै दस्सेआ ऐ जे बलूचिस्तान दे त्रै बक्ख-  
बक्ख जिलें थमां दऊं भाएं सनें 4 बलूच नौजनवान लापता न।

<><><><><><>

### Amarnath

सालाना अमरनाथ जातरा दी तैयारियां शुरू होई गेइयां न की जे जम्मू संभाग  
दे 10एं जिलें च सेहतू सरबंधी हेल्थ सर्टिफिकेट जारी कीते जा करदे न।  
आकाशवाणी दे जम्मू आहले संवाददाता नै खबर दिती ऐ जे जम्मू संभाग च  
सेहत केंद्रें सवां लाजमी हेल्थ सर्टिफिकेट जारी करने लेई कुल 112एं डाक्टरें  
गी नामजद कीता ऐ। उआं अमरनाथ यात्रा दी तरीक बारै अधिकारिक घोषणा  
होना बाकी ऐ। हाल च श्री अमरनाथ श्राईन बोर्ड दी होई दी मीटिंग च तरीकें  
बारै गल्लबात होई ही। 29 जून गी जातरा शुरू होने दा संकेत थोआ हा।  
जिला कठुआ ते जम्मू च सब्बनें कोला मते सेहत केंद्रें गी नामजद कीता गेआ  
ऐ। एहदे च एसोसिएटेड अस्पताल, सामुदायिक सेहत केंद्र ते जिला अस्पताल  
शामल न।

<><><><><><>

## UNSC-Gaza

संयुक्त राष्ट्र सुरक्षा परिषद नै पैहली बारी गाजा च इजरायल ते फिलीस्तीनी समूह हमास बश्कार फौरन युद्ध विराम ते सब्बै बंधकें गी फोरन ते बिना शर्त रिहायी दी मंग करदे होई इक प्रस्ताव पारित कीता। कल 14 मुख्यें प्रस्ताव दा समर्थन कीता, पर अमरीका, इजरायल, वोटिंग थमां गैर हाजर रेय।

<><><><><><>

## **Pak-AFG**

पाकिस्तान नै तकरीबन 10 लक्ख दर्ज अफगाने गी अफगानिस्तान वापस भेजने लेई अपने प्रत्यावर्तन अभियान दे दुए गेड़ गी शुरू करने दी तैयारी रम्भी दिती ऐ। रिपोर्ट च आखेआ गेआ ऐ जे घटनाक्रम थमां वाकिफ इक अधिकारी नै आखेआ जे अफगान नागरिक कार्ड ए.सी.सी धारकें दी मैपिंग च तेजी आंदी जा ते इस सरबन्धा च जिला प्रशासन ते पुलस गी निर्देश दिते गे न। खैबर पखतून ख्वा दे अडिशनल चीफ सैकरेटरी आबिद मजीद होरें आखेआ जे मैपिंग प्रक्रिया पैहले थमां गै रम्भी गेदी ऐ ते रमजान दे मगरा एहदे च तेजी आओग ते 30 अप्रैल थमां पैहले सर्वे पूरा होने दी संभावना ऐ।

रिफ्यूजिं लेई संयुक्त राष्ट्र होई कमिशनर मुजब पाकिस्तान च 20 लकख 18 जहार दस्तावेजी अफगान शरणार्थी न जेदे च 2006-2007 च आयोजित जनगणना मुजब 10 लकख 3 जहार दे कोल कश पंजीकरण प्रमाण कार्ड न ते 2017 च पंजीकरण मुहिम दे बाद 8 लकख 80 जहार बादू रिफ्यूजी गी ए.सी.सी कार्ड जारी होए दे न।

<><><><><><>

### **Ujjain Fire Probe**

मध्य प्रदेश दे मुखमंत्री मोहन यादव होरें कल उज्जैन दे महाकालेश्वर मंदर च लग्गी दी अग्ग दी घटना दी मैजिस्ट्रेट जांच दा हुकम जारी कीता ऐ। मीडिया कन्ने कल रातीं गल्लबात करदे होई मुखमंत्री होरें आखेआ जे सरकार सब्बनें घायलें गी बनकदा इलाज ते दिक्खभाल मुहैया करोआग। उनें घोषणा कीती जे राज्य सरकार हर प्रभावित गी इक्क-इक्क लकख रुपे दी माली सहायता उपलब्ध कराग।

<><><><><><>

### **Separatist-SAMA Shabir**

जम्मू-कश्मीर दे बक्खवादी नेता शब्बीर अहमद शह दी धीs समा शब्बीर शाह ते मरहूम हुरियत नेता सैयद अली शाह गिलानी दी पोत्री रूवा शाह नै कश्मीर दिएं मकामी अखबारें च अपने आपें गी बक्खवादी विचारधारा कोला बक्ख करदे होई इक्कै नेह नोटस छपवाए न।

पिछले दिनें प्रकाशत नोटस च बक्खवादी नेताएं दे परिवार दे जीएं इनें दउं महिलाएं एह दावा कीता ऐ जे ओह भारत दियां वफादार नागरिक न ते ऐसे कुसै बी संगठन कन्ने उंदा कोई सरबंध नेई ऐ जैड़ा मुखे दी एकता अखंडता ते संप्रभुता दे खलाफ ऐ।

<><><><><><>

## IPL

कल रातीं बैंगलुरु दे एम. चिन्नास्वामी स्टेडियम च खेड्ढे गेदे आई.पी.एल क्रिकेट दे इक मकाबले च रायल चैलेंजर्स बैंगलोर नै पंजाब किंगज गी 4 विकटें कन्ने हराई दिता। टीम नै 19 ओवर ते 2 गेंदें च 6 विकटें दे नुकसान पर 178 रन्ज बनाइए जित लेई लोड्ढे 177 रन्ज दे लक्ष्य गी पार करी लैता। बैंगलुरु दी तरफा विराट कोहली नै 49 गेंदें च सब्बनें शा मते 77 रन्ज बनाए जिसलै जे दिनेश कार्तिक नै 10 गेंदें च 28 रन्ज दा जोगदान दिता। आई.पी.एल च अज्जै दा मकाबला चिन्नेई दे एम.ए चिदंबरम स्टेडियम च चिन्नेई सुपर किंगस ते गुजरात टाइटन्स बश्कार खेड्ढेया जाग। एह मैच सड्डे 7 बजे शुरू होग।

<><><><><><>